



BBVA bankuko akziodunen batzarraren irudia, Bilboko Euskalduna jauregian.

MONIKA DEL VALLE

BBVAk Telefonicarekin sinatu akordioa zehaztu beharko du

Bankuak ukatu egin du %10 baino gehiago erosi izana

Agentziak / Madril

Banco Bilbao Vizcaya Argentaria (BBVA) Telefonica komunikazio enpresarekin sinaturiko akordioaren xehetasunak eman beharko ditu. Espainiako Gobernuak bankuak Telefonican izan dezakeen partaidetzak %10en azpikoa izan behar duela gogorarazi du, eta hori ziurtatzean bakarrik onartuko duela akordioa. BBVAk ukatu egin du Telefonikako %10 baino gehiago erosi duela.

ESPAINIAKO GOBERNUA BBVA eta Telefonicaren arteko akordioari betoa jartzeko aukera aztertzen ari dela plazaratu zuen atzo *Abc* egunkariak. Legearen arabera, ezin da erosi lehen enpresa publiko izan denaren %10 baino gehiago, eta BBVAk ez du zehaztu Telefonikako %10 baino gehiago erosi duen ala ez.

Egunkari horrek berria kaleratu eta gutxira, BBVAko

iturri ofizialek Telefonikako %10 baino gehiago erosi izana gezurtatu zuten. BBVA komunikazio enpresaren %8,6ren jabe da egun, eta partaidetza hori handitzeko asmoa azaldu du, «betiere %10a gainditu gabe». Espainiako Gobernuak aste honen bukaera arteko epea eman dio BBVAri Telefonican zenbateko partaidetza daukan zehazteko.

Monopolioak saihesteko xedea

Espainiako Gobernuak bi enpresaren arteko akordio mota hauetako jartzeko eskubidea du, *golden share* esku-menaren bitartez (administrazioak aurrez emandako baimen ahalmena). Rodrigo Rato Gobernuako Ekonomia ministroak esan zuenez, «alor berean lehiatzen diren bi enpresetan banku bera ez egotea da, horrela lortuko baita monopolioa saihestea».

Jose Maria Aznar Espainiako presidentea eta Francisco Gonzalez BBVAko lehendakarietako bat —Emilio Ibarra da bestea— atzo elkartu ziren, baina ez zen bileran hitz egingidakoaren berri eman.

laburrean

■ ELA sindikatuak manifestazioa egingo du Bilbon negoziazio kolektiboaren inguruko aldarrikapenekin

NEGOZIAZIO kolektiboa bultzatzeko, ostiral honetan Bilbon ELAko delegatuek manifestazioa egingo dutela iragarri zuen atzo Jose Elorrieta sindikatuko idazkari nagusiak Tolosako ELAren egoitza berriaren inaugurazioan. Manifestazioa Confebask patronalaren egoitzaren atarian egindako kontzentrazio batekin amaituko da. Elorrietak azaldu zuenez, sindikatuak 35 orduko lan astearen aldarrikapenari eusten diola azpimarratu nahi du eta 1994tik hona izan den hazkunde ekonomikoa ez dela langileengara iritsi salatu zuen.

■ Bolanta sareak 2002. urtean debekaturik egongo direla berretsi du Europako Auzitegiak

EUROPAKO Justizia Auzitegiak berretsi egin zuen atzo 2002ko urtariletik aurrera bolanta sareak debekaturik egongo direla Europako Batasuneko uretan. Horrela, Luxenburgoko Auzitegiak atzera bota ditu Frantziako eta Irlandako arrantzaleen ordezkariak Europako Kontseiluaren erabakiaren aurka aurkeztu helegiteak. Yeu uharteko arrantzaleek eta Irlandako zenbait arrantzale elkarteak aurkeztu zituzten helegite horiek.

■ Bizkaiko Aldundiak, Eudelek eta BBK-k enplegua sustatzeko zentroak eratuko dituzte

BIZKAIKO Aldundiak, Eudel Udalen Elkartek eta BBK-k hitzarmen bat sinatu zuten atzo herrialde honetan enplegua bultzatzeko zentroak sortzeko. EAEko erakundeak prestatzen ari diren Enplegu Egitasmoaren barruan dago hitzarmen hau. Lau urteko iraupena izango du eta 400 milioi pezetaz hornituko da, BBK-k eta Aldundiak erdibana jarritakoa. Zentro horiek Bizkaiko eskualdeetan kokatuko dira, lan aukerak, autoenplegua nahiz enpresen sorrera bideratzeko.



GARI GARAIALDE

Industria jardunaldiak La Sallen. Industria jardunaldiak burutu ziren atzo Andoingo La Salle Berrozpe Ikastetxean, Ibermatika enpresarekin sinatu akordio teknologikoren ostean. EAEko Lanbide-Kualifikazioen sistema berria izan zuten hizpide, eta *La Salle Berrozpe eta Enpresak* gaia jorratu zuen Mikel Balerdik, ikastetxeko zuzendariak.

Burtsa

• J.B. ANDUEZA •

‘Golden share’

Edo urrezko akzioa. Hori izan zen atzoko hizketagai nagusietako bat. Nekez sinets daiteke hauteskunderen aurretik BBVA (-%1,37) eta Telefonicaren (-%2,36) arteko akordioan Espainiako Gobernuak eskua sartuko duenik. Bankuak azaldu duenez, ez du %10eko partaidetza gainditzeko asmorik eta hori da Gobernuak bere beto eskubi-

dea erabili ahal izateko baldintza. Gainontzean, Terrak (-%7,5) aldakortasuna zer den erakutsiz jarraitzen du eta, Telepizak (%3,34), txerri mozorroa aukeratu du, inauteriak aurreratuz edo. Endesak (%3,99) eta Amadeusek (+%4,45) egun ona izan zuten atzo, BSCH (-%1,36), Ferrovial (-%2,99) eta Continentek (-%2,65) ez.



■ KONKURRENTZIA

Deunaren azken miraria: Telefonikak euskarazko deiei erantzuteko *call center* bat iriki du Donostian. Pixkanaka, bagara.

■ **LATIBEX**ean Mexikoko Telmex telekomunikabide taldea, Venezuelako Provincial bankua (BBVAren taldekoa), Inbursa, Globo Cabo eta Brasilgo Electrobras sartuko dira. Bostok merkatuaren kapitalizazioa zortzi halakotuko dute.